






AUG

9200-

-9219





SONUS
VOCALIS CAMPANÆ

^A
Principe Petra & sepulchrali saxo
REPERCVSSVS.

Immortalem Meritorum & Sapientiæ famam

REVERENDISSIMI olim PATRIS

ANTONINI
CLOCHE,

SACRÆ Theologiæ PROFESSORIS,

Universi Prædicatorum Ordinis

GENERALIS MAGISTRI.

PROMVLGANS.

& dum.

PIIS EIVSDEM MANIBVS

Debitus Exequiarum Actus

^A

Maestissimo & Devotissimo. P. P. ORDINIS PRÆDICATO-

RVM Conventu Cracoviensi ad Ædes S.S. TRINITATIS

In magno Condolentium Hospitum Concurſu

perſolveretur:

Philadelphico Corde

Per

M. ÆGIDIUM STEPHANUM WADOWSKI,
Philosophiæ Doctorem, Scholæ Dialectices Professore, Collegam
Minorem Vocatum, Contubernij Geloniani Seniore.

CONCITATUS.

^{Annô quô}

Mors Decepta taCet, paX, Verbo est Vera sonante.

Die verô quô

Fragrant! terræ fœla IVnll erat.

CRACOVIAE TYPIS UNIVERSITATIS.



Admodum Reverendo ac Eximio Patri S. Th: Magistro

**P. CYPRIANO
SAPECKI,**

PRIORI Conventus Cracovien: SSMÆ TRINITA-
TIS, VICARIO Provincialis Contratæ Minoris
Poloniæ Ordinis Prædicatorum.

ADMODUM REVERENDIS & EXIMIIS PATRI-
BUS S. Th: MAGISTRIS, REVERENDIS ADMO-
DUM PATRIBUS S. Th: Præsentatis. REVERENDIS
PATRIBUS S. Th: LECTORIBUS, cæteræq, INCLY-
TISSIMÆ COMMUNITATI.

Amplissimi ejusdem Conventus Cracoviensis.

Patronis Colendissimis.

Aug. 9218



*Tro inumbratam colore, Magni clim Vestrũ
Generalis Imaginem gentiliuã Ipsius, resonan-
te Campanã, ad Aram Cordis Vestri, vene-
rabundus impono, vel potius in cordibus ap-
pendo. Admodum Reverendi & Eximij Patres
Peccare certè contra Divinũ Aeterna Verit a-
tis viderer effatum, quæ olim porrectam sibi
Cesaris imaginem, Cesari reddendam decre-
vit tantòq, decretò, etiam hanc Vobis, utpotè Vestrũ Præsidis
offerendam iniunxit. Quanquam nec Vobis hæc porrigi debet, ut*

A

pote

potè cum vivam in Vobis exprimatis, cum defuncti lineamenta,
Virtutibus magnisq; operibus ex asse depingatis. Habetis sat in-
numerum Imaginum syllabum, habetis tot sacratas Aboriginum
Vestrorum Statuas, quibus bajulam onerastis terram, Religiosos
adornastis Parietes, Celos ipsos adimplestis, etiam hac iisdem ap-
perdi debet. Os de ossibus Generalissimorum Patrū Vestrorum
ANTONINUS, in hoc majestuosissimo **TRIADIS** SSma, tem-
plo, in eburneum Ejusdem abeat thronum, ad cultum illius suā
Campanā fidelem Christiadam convocet turbam, vocaliter sonando,
In pervetustis Majorum suorum atris, per fasces numerabat Avos,
vetus Romanorū Antiquitas; in hac Religiosissima Vestrum Domo,
per Sanctorum Imagines, calculari debent Patres, imò quotquot
gressus in Amplissimo Vestrum Canobio formantur, tot Sanctorum
Corpora calcari constat. Sanè Domus hac Vestra, Angelorum Co-
loma, Calitum Chorus, Celi Suburbium, Virtutum Habitaculum,
Sapientie Regia dici meretur, cui Summus Regni Sarmatici Prae-
ses, **LESCO** niger, atris Cognominis umbris, & liberalitate aureā,
prima lineamenta dedit, suq; delineata Caput magnis cogitationi-
bus plenum, pro fundamento sepulchralibus cineribus deposuit, cum
Domum Vestram Sanctorum, Doctorum, & Patrum Maximo-
rum fore Capitolium praeceperit. Nec suam nigredinem bellicis con-
tractam pulveribus melius eminere ratus, quàm ad Religiosissimum
Ordinis Vestri Candorem. Addidit album votorum calculum nigro
huic **LESCONI** nivea tyarati Vavelli Gemma, Sanctitatis Apex,
Cracoviensium Sacrum Praesulum Decus, **VO** EPISCOPUS, qui
pariter plurima Ordini Vestrum Sacratissimo inferens beneficia, se-
ipsum intulit, cum **ODROW** & **ZIA** suā Sagittā in Vestrum pectoribus
haesit, ibi pijsissimis Cineribus Sepulchrum elegit, ubi non sepulchra-
li lapide, sed pretioso Hyacintho suo Nepote, eosdem claudi & con-
signari speravit. Erectam magno sumptu Basilicā, immensa **TRI-**
NITATI dicavit, ut ex tanto titulo etiam Vestrum ab oranibus nosce-
retur perfectio, magnitudinis Vestra pateret immensitas: qua se eam
adusq; demonstrat, ut totum ferme pridem in Vobis adimplere Orbem
videatur. Quippe nullus Sarmatici Campi locus, quem Gentilius
Vestrum Catulus non percurrisset. Nullus terrarum Angulus, quem
suo funali non irradiasset, quem lumine fidei non illustrasset, pradam
Ecclesiae, fidei, Religioni, in lucrandis Animabus attrahendo. Per-
curri-

curristis tot Gentes immanitate barbaras, quibus, Divinitatem quā-
dam instillastis in **HYACINTHIS**, **CESLAIS**, **FLORIANIS**,
BENEDICTIS, **GODINIS**, & alijs innumeris Poloniarum Apo-
stolis, Vestro Candore farmaticam dealbando Aquilam, Vestra sapientia
lacte in cunis Polonia vagientem fidem nutriendo, sterilem Polonia
glebam, Marianis implantando rosīs, tot. S. S. Martyrum exornan-
do palmis. Tyarato Vavello Coronarum ternioni, unicam Gemmam
HYACINTHUM extraxistis, ast Unionem hunc innumeris cum
sanore rependistis Capitibus, pretiosissimis solvistis ingenijs: ex hoc
Conventu Purpuratos Antistites, Insulatos Suffraganeos, in **BE-**
RENGARIIS, in **MARIANIS**, in **PAULIS**, in **MALACHO-**
VIIIS subministrando. Loquuntur etiam alia Vestrum magnitudi-
nem Insulae, & aperto quasi ore ad Caelum hiantes eandem attestan-
tur. Benedicunt Vobis, imò Vos optimos possessores sui designant, Sa-
crata Archiprasulum Cruces, quibus Vos eminentes, purpuram san-
guinis explicare pro fide non passionem esse duxistis. Ipsa suprema
Ecclesia Capita, plurimos ad mentem suam habuere ex Vestrum syl-
tabo Viros, iam eosdem suos Penitentiarios, iam Censores fidei,
jam Hæreticæ pravitatis Inquisitores delegando: ut sciret Orbis eti-
am secreta Conscientiæ summorum Pontificū, sub Vestris Hortensiarum
Polonorum rosīs latere posse, & nullius mentis acumine Hæreticos
melius pungi, quàm Doctissimorum Caputum Amplissimi Vestrum Cæ-
nobij. Pro alijs mille vel solum innuisse **MELCHIOREM MO-**
STICENSEM S. Th. Magistrum, sanctitatis ideam, fulmen Hæ-
reseos, satis esto: qui **STANISLAVUM** Antistitem inter Sanctos,
flare effecit & procuravit, quem à Rege Poloniarum missum Lega-
tū **GREGORIUM** solenniter Hospitē magnū excepit, cū ordinato
sibi assistentiū catu, in Urbē duxit, Caput Ecclesiæ agens, cor suum dedit,
Reducem tandem tota Metropolis Cracovia salutavit: & cum ma-
gno populi occurrentis agmine in portas traxit. Nec immerito, me-
ruerat ejusmodi plausus & affectus **MELCHIOR**, utpotè quò nul-
lus illò seculò visus melior, nec avdentior, utpotè qui Doctorali præ-
cinctus laurō, etiam fulmina Regis non timuit, inestimabilia Ec-
clesiæ obtulit munera, cum eandem Zelator munivit: omnibus affa-
bilis, ipsis nonnisi Hæreticis amarus, quibus Myrrham non ad gu-
stum porrexit. Apostolicū admiramini ausum? **SIGISMUNDO**
AVGVSTO blasphemiarum & errorum schedas approbare volenti,

pennam eripuit, potius è vivis pennâ hac proscribi mallens, quàm
ut tantum in regnum involasset nefas. Videat Orbis quanta Pra-
dicatorum Capita possunt, si manus tanta audent! quantus Zeli ipso-
rum ardor, cujus flammâs, etiam Regij illuminantur splendores,
quanta ipsorum Authoritas, si ipsidem calamos negant, quibus sceptrâ
aurea concessa, ne illorum acumine fidei vulnera inferantur. Quid
de sapientia Domui huic Vestra inquilina proferam? plures certè ex
sacratî Apollinis Vestri Pegaso prodiere Doctores, quàm armati ex
Trojano Equo Heroes. Nullibi melius Aquinatici Doctoris Vestri di-
stingvuntur Articuli quàm in amplissimo hoc Vestrum Canobio, doctis
Capitibus. Nullibi THOMAS magis abyssalis apparet, quàm à Ve-
strorum sensuum profunditate. Quorum Numerum Orbi explicare,
idem labor est, ac summam Angelici Doctoris appretiare. Ex ungue
noscentur Leones, ex Doctoralibus Vestrum pennis, quibus millena
exarastis volumina; ANGELVS THOMAS optimè cognoscitur. Ab-
sit tamen Doctorum Vestrorum Capita mihi excitare, absit eosdem è sepul-
chris ad funus istud educere, quiescant publicis fatigata laboribus, Vos
non nisi superstites, minùs vivaci calamò veneror, Magna Conventus
istius Numina & Patria Patres. Inter quos Tuum dolens penna ho-
norem primò attingit. Admodum Reverende & Eximie Pater S. Th.
Magister. P. THOMA ENGVER Polonæ Provinciæ Meritissime
Provincialis, Generalis Magistri pressa meritis, in te Abyssum venera-
bunda cadit, etiam Tuam Magnitudinem ejusmodi casu adorans, &
cùm Te Conventus huius Amplissimi Doctorem sciat, se se Doctori
submittit. Irrigasti scholasticam Arenam, ex qua non laurus ipsa
Tuo Nomini pullulavit, sed etiam Clavus Provincialis honoris ex-
crevit, quem ad omnium stuporem & commodum geris, speciem di-
gnam Imperij retinens, ingenio tuò nil speciosius, habere observaris.
liliatò senio candidos Religioni officis dies, verè THOMAS non sine
torque amorum, quibus stringeris; non sine Phæbo sapientia radiando.
In Tui tandem nominis collimat venerationem penna, quem vel in
ipso exordia pro meta posuit Admodum Reverende Pater S. Th. Ma-
gister P. CYPRIANE SAPECKI, Conventus Crac. Dignissime Pri-
or &c. qui ne ferale mortis summus Generalis experiatur Cupressos,
Tuo Nomine Eundem coronas, funebrali pompa illustras. Arborem
Cyprissi Tuum Nomen sapit, illam certè, in qua omnium virtutù spe-
cies & genera ordinata Dialecticus legere possum; vel si à Cypro
Cypri-

CYPRIANUS dicaris crede Insulā agis, ad quā per Aquinatica flumi-
na innumera confluxere sapientia decora. Mirantur Tuae mentis acu-
mina sublimes Cracilidum Turres, vigil ad portam Aquila, Tuo Pra-
conis calamo, suis applaudit pennīs, Sarmaticarum Urbium Caput
Cracovia, Tuum adorat Verticem, Sacri Exedrarum suggestus, in Te
redi-vivos experiuntur Tullios, Apostolicos agnoscunt Pracones, uni-
versi aestimant, venerantur: adeo ut quoties futurum pro Sanctis, spe-
rant Te; Praconē tubis, quibus convocentur non egent, voce Tua sva-
vissima, quam veluti Tuba exaltas, contenti. Ita sanē populo placere
non cessas, ut etiam summis non displiceas Principibus, quorum pecto-
ra possedisti. ab iisdem Religioni Tuae favores pertrahendo, Tui ve-
nerationem extorquendo. Reflorescit in Tuas pariter laudes, quan-
tumvis gelida timore leti facundia, Admodū Reverende & Eximie
Pater S. Th: Magister P. FLORIANE STRASZYNSKI, Polonae &
Lithvanæ Provinciarū Primarie & Meritissime Pater, quantumvis
Magnitudine meritorum Tuorum, virtutum excellentiā, ut potē mi-
nūs culta terreatur, quantumvis Tripodem altorum sensuum, Ideam
sapientia, Religiosū Numen & Oraculū Tu agens, illam in stuporē ra-
pias. Sequi te, suā pennā debuit, cum Te ex Cracij Conventūs nido
evolasse Doctorem non ignorat; Evolasti inquam ad sumam Pro-
vincia sedem, bis Provincialis factus, pluries petitus, nisi humilitas Tua
aligentium votis contraria esset, Alcidem ipsum superasse videris, ut
potē cum ne Hercules contra duos, Tu unus plurimis suffecisti laboribus.
Vigent adusq; nostrū memoriae Tui eloquij flores, quibus coronatam
in Circulo Cracoviensi Virginem ordinarius Praco stipasti, nec viti-
osum se adusq; circulus fatetur, a Tuae probitatis centro, rectas lineas
ducere edoctus. Amaros funeris istius dolores, etiam Tu nomine Tuo
melleo adaptas Adm R. P. S. Th: M. P. AMBROSI ZAGAIOWSKI,
Conventūs Gidlensis Prior Aestimatissime, qui non ibi tantūmodo
ad miraculosū locū illum, sed etiā ubiq; prodigiū ingeniorū dici & vide-
ri mereris. Cui in hac Conventu Amplissimo Scholastici labores ludi erant
falsi sudores, sva-vissimi putabantur. Ab ore Tuo Amplissimo Ordo flu-
mina eloquij manare, ab oculis gratias promicare, à vultu virtutem
stillare observat, non minūs Majestatem, quā affabilitatem Patris
in Te venerando. Ambrosiano ori apes mel instillasse dicuntur; Tu ab
apibus quantumvis nihil habes, favos tamen mellifluos omnibus pro-
pinas, ex quibus eruditorum participant agmina, non absq; Ceris Cle-
anteis,

anteis. Et Te prospicit lachrymis innatans merentis Oratoris pupilla,
quas ad Te referri jure merito censet Admodum Reverende P.
S. Th: Magister SEVERINE OCZKO, paginam, hanc etiam Tuo
Nomini devotam despicere non potes, qua ultrò se se objicit. Specu-
laris Thomisticum Phabum perspicacissimus Ocellus, etiam umbras
Tuas, quæ splendores meritorum Magni Generalis tegunt, intueri non
dedignare. SEVERINVM quidē Nomine portas, omnibus tamen Te
affabilem, jucundum exhibes, contra Te ipsum non nisi severus esse
appares: Atlanteos Tuos lacertos, aliis laboribus & bono communi fa-
tigando. Sed quis Magnorum Oratorum numerus, Vestrum com-
plecti poterit elegia, quæ penna Vestram attinget sublimitatem, im-
plestis Nominibus Vestris seculorum Annales, hæc tenui non potestis
capi pagellâ. Quisquis profundum elogiorum Vestrorum Mare, e-
xiguus labijs haurire attentaret foveâ, Augustini certè revocaret tem-
pora. Magni Patriarchæ Filij estis, ad cujus frontem & mentem
nonnisi Cæli sidera, sunt, quare exigua facundia lumina, nec Vobis pla-
cere possunt. Et si Phæbus tantus, vix unius Thomæ cõtexit pectus, quis
dicendi ornatu, aut quis verborum apparatus, Vobis pluribus sufficiet.
Aureo Angelici Doctoris torque, Vestrum nonnisi connecti merita
possunt: Sibynoticis Oratorum periodis ambiri nequeunt. Imò vel
ideò Astrorum Princeps Phæbus ad pectus THOMÆ descendit, ut
Prædicatorum Ordinis Capita supra sidera esse demonstraret, sicq; dum
alii vix mente sidera tangunt, illi infra se eadem posita gloriantur.
Quare nonnisi Imaginem Generalissimi Vestrum Præsidis Vobis da-
re & offerre iustissime duxi, cum dictionis meæ nullam agnoscam
speciem, nullam in verbis & sensibus formositatem. Verba dicentis
perpendere absit, sed vocalis Campana sonum attentiores perci-
pite, quam si philadelphico corde minùs pulsavi, Vos Vestris compen-
sate. Non condignè quidem, tam Meritissimi in Ordine Vestrum
PATRIS adnotavi elogia, Vos notas quas incurri dolentibus delete
lachrymis, ex illis solatia, feliciores successus trahite, ita sonat, ita pre-
catur.

Nominis Vestri.

Cultor & Servus.

ORATIO.



Bsit mirari AA. quòd in tam vocali loci istius suggestu, in tam amplissima Vestrum frequentia, sine voce, sine sono, admirabundus hæream. Quippe ex lachrymarum fontibus, ducendum exordium Oratori; ubi oppres-

for cordium dolor, tristem spectatori oculo propositionem statuit. Pallescit timore nimio Academicus Candor; postquam ad lugubrem ejusmodi Actus squallorem provocatur. Decrescunt tremuli, etiam Tulliorum flores, ubi ad acutam crudelis Libitinæ falcem applicantur; nec possunt Oratoria in filo duci argumenta; postquam chalybeato atrocium Parcarum telò, ductilia per annorum seriem, vitæ stamina præscinduntur. Periculosa plenum opus alex, pessima inter lusus elogiare speranda sortilegia; ubi arida ossa, peroraturis pro objecto exponuntur. Ut quid hinc venustus verborum & dictionum apparatus? quid juvat facundi oris ornatus? ubi nonnisi lugubria funerum velamina requiruntur. Sanè, quis hinc securus in dicendo Orator? inter tot dentatos, qui Aris & feretro in imaginibus mortis adsunt Zoilos. Dura certè apud Rhetores Metaphora; quæ ex sepulchrali desumitur & transfertur lapide. Non vivaces Elogiastarum spiritus, inter condensata cadaverum agmina; fumigant magis, quam splendent figurati verborum splendores, à funeris Ceris derivati, mutusq; non facundus ille censendus Mercurius, qui letiferi pegmatis ligno effor-

B

ma-

matür. Indignatur credite animorum Regina
Eloquentia, ubi contra practicatum Regio No-
mini auctoritatem, non in throno sed in sarco-
phago collocatur. Quæ rerum & temporum sce-
na! Religiosissimus Prædicatorum Ordo, vocales
per sacras exedras Oratores, lachrymarum hodie
affluunt fontibus! itane Angelica Thomistarum
Schola, non pectoralem tantum sui Præsidis solem
sed & tristem advesperascentis vitæ Phosphorum
experitur? Itane inter eruditos Aquinaticæ do-
ctrinæ articulos, cadavera hominum condensan-
tur. Itane sacer hic magnorum Patrum Ordo, in
suo nativo Candore, atras fatorum agnoscit for-
tes? itane Princeps ferè Christiani Orbis Religio,
ad cujus mentem literata sapientum vivunt Lycæa,
suum Caput amisit! itane vocalis hic Cygnorum
cætus, Doctoralibus implumatus calamis, ad la-
chrymarum fontes, Cantator funeris ipse sui? ita-
ne Gentilitius Dominicanæ Religionis Catulus,
non ad Domus suæ splendorem, sed ad tristes exe-
quias, ardens præfert funale? & nimis præcoci Ca-
nicularis aspectus influxu, dignitariam sui Gene-
ralis sedem vacare facit? itane supremum Prædi-
catorum Genus, contra veteranam Porphirij se-
riem, ad radicem, vel potius ad sepulchræ solum,
non ad arboris cacumen locari debet? itane fide-
rea Domini frons, ultimâ vitæ lineâ Magni Ge-
neralis corrugabitur? itane Rosarianis Cultoribus
ferales mortis porrigi debent Cupressi? & nimis
dolorosa accumulâri Mysteria? itane in Junio, non
juniorum tantum, sed Maximorum primorumq;
in Orbe Capitem peraguntur funeralia, & ubi ver-
borum sonitus ab ore fundendus erat, ibi mugien-
ti campanarum ære strepitus & fragor dolorum
exci-

excitantur. Sed absit inter pallidas mortes timore
albescere AA. Opposita penes se posita, si magis
elucescunt; Academicus Candor, inter umbras
ejusmodi clarior apparebit. Arida adstantium Par-
carum ossa, figuratos Oratorum non eludent lu-
sus. Non cadit Elogiastarum animus, quantum-
vis ad sepulchralem lapidem impingat. Exequia-
lem funeris pompam, umbratilis dictionis appa-
ratus augebit, non diminuet. Ad actus funere-
os, etiam sine diserto labio acceptantur statuæ,
absq; cerebro non arcentur Capita. Ardeat di-
ctionum animus; non frigescat congelatum for-
midine pectus; postquam Philadelphicus Amor,
de sepulchrali lapide, scintillas elicit, in triumph-
alem rogam & ignem abituras. Non ad ipsos vitæ
plausus, Oratoriæ resonant voces, multò vocalio-
res apparent commodiùsq; audiuntur, dum pro-
fundum Libitina imponit silentium. Non sicca
dicendi materies, inter arida Lachesæos ossa, satis
prolixa dictionum amplificatio desumi potest;
quantumvis ex tricubitali urnæ domicilio. Itur fa-
cillimè in laudes Virorum, etiam per calvarias ho-
minum, & quamvis verborum pondus eluctantes
in altum premat Oratores; nulla tamen sub tan-
to pondere iisdem passio. Pridem pridem Regu-
lares Dominici dies, quos aliquando in sanguineo
Matyrum rubro gemmeis & aureis characteri-
bus scriptos legit Polonia; in lugubres Mortis fe-
rias mutari non tenentur. Dilecti Mariæ cum Hy-
acintho Filij, gaudere potius, non diem iræ intona-
re debent. Terrestris Angeli hi, non mo-
riuntur; ast post expedita in gentibus & nationi-
bus obsequia, corpora exuunt, quibûs etiam indu-
ti, caruisse videbantur. Aquinatici Doctoris Di-

scipuli, cū omnia sciant, fata cognoscere ignorant, imò pectorali armati Phæbō, vespertilionem Lachesim cæcutire faciunt, à suis luminibus & magnis splendoribus, hoc expupillatum Numen propulsant. Habet habet Thomistica Schola, scholasticos pulveres, qui per Doctoris sui Phæbum, athomorum attracti more, in fulmina, contra Encelados Fidei, cōalescunt; intra hos tamen, sepulchrales non observantur cineres. Sub Gentilismo Sacræ hujus Religionis Sirio, otiosi & vacare videtur, alibi summe operosa Libitina, & nimis offesa, accedere trepidat; ne vel lædatur vel domestico prælucente sibi funali, ut pote cæca, ad feretrum & sepulchrum ipsa reducatur. Sacerrimus cum suis Capitibus Prædicatorum Ordo, prædicari non nisi meretur, atris fati subijci nunquam debet; ipsō certè Dominicanorum e hymnō servilia postponit vincula & æternantis canitie sibi attribuit sæcula. Rosariani plantatores hi, fati palle-scere erubescunt, spinas & tribulos rident & continuo Orationis ardentes fervore sepulchrali marmore frigescere non tenentur. E terris ad astra ire si negligerent, si ferri ad sidera non curarent; certè practicato jam unius sideris ad frontem Dominici descensu, omnia venire ad se cogerent & à Cælestibus sphæris provocarent. Tragicam tamen adhuc in loco hoc admiramini scenam! squallidas in amplissimis Religionis Candidæ lari-bus stupetis umbras, in Aquinaticæ Stoæ liminibus, forsitan adusq; lachrymis non absimiles supponitis fontes! acutiùs & attentius animos oculosq; vibrare, lætiora inter ipsos dolores spectaturi. Nimirum Sacerrimus hic Prædicatorum Ordo, Primum sui Caput & Præsidentem Reverendissimum

Patrem ANTONINUM CLOCHE S. Theologiæ
Professorem & Generalem Magistrum, dum ad
Cælos miserit, magnitudinis illius umbram non-
nisi Vobis, inter squallores istos demonstra-
re exambit; ut quis, quantusve fuerit, vel ex sola
umbra cognoscatis. Breviori emphasi loquar: Or-
bis totius delictum, fidei præsidium, septicollis Ur-
bis & suæ Religionis sublime decus Patrem hunc,
vivum nobis præsentare non potuit, nunc vitam
Libitina carpente, ex fructibus immortalium Ejus-
dem operum, cognoscendum statuit; quem si su-
perstitem ad se evocasset, vel totam Romam cum
eo hîc videretis. Duodenis ferè annorum lustris
sibi imperantem Præsidentem, cum venerata fuerit,
filialis amoris tædis, multorum imò omnium affe-
ctuum flammis, eundem illustrare tenebatur. Ob-
sequium approbate AA. Decebat quidem; ut for-
tissimus Dominicanæ Religionis Atlas, sub ope-
rum & curarum mole fatîs langvescens, Regum
& Principum (quibus cordi erat) jam stipatus
malis, etiam Sarmatici Campi floribûs fulciretur.
Decebat, ut magnus hîc pro Religione & Fide Ze-
lator, non ipsi polo, sed & Poloniæ, cum sua im-
mortali fama inferretur. Quanquam eundem Po-
loniæ illatum dicere non est satis, qui toto Orbe
inclaruerat vocalissimus. Decebat, ut ad magnani-
mum Viri hujus corpus, etiam Lechicæ convo-
larent Aquilæ, albo suarum pennarum acumine,
inter tristes umbras sereniora notarent elogîa, ut
quiescenti post magnas cogitationes Prædicato-
rum Capiti ex niveis pectorum plumis molliora
strueret cervicalia. Decebat inquam, ut cui Va-
ticanus Sacratior de Principe Petra gloriosum fe-
cit

cit sepulcrum, huic etiam Tiaratus Vavellus integram sui rupem in Mausoleum non negaret; ut Ecclesiæ fidem servanti Patri, cursum gloriæ consummanti, non una, sed trina Craciæ Cathedræ imponeretur Corona. Decebat, ut Generali Magistro, Generalis Regni Poloniarum Schola, aureis suis applauderet Sceptribus, vel potius ut sub sceptrifera Cruce, scientiarum Mater, hinc inter lachrymas staret dolorosa. Decebat, ut fontes Aquinaticos, quos immenso indies haurit alveo, dolentibus de casu tanti Capitis lachrymâs refunderet. Decebat, ut gentilitia Generalis Reverendissimi Campana, nuper sepulchrali Libitinæ percussa saxo, nunc omnium pulsata cordibus, etiam in sublimi Turrium Craci ternione resonaret. Factum est quod dixi AA. factum ad mentem Tuam Religiosissime Prædicatorum Ordo, bono ordine morientis pectoris Tui succedunt vota; in sidereo amplissimæ Religionis Tuæ Cælo, squallidas mæroris condensasti nubes; ex omnium nostrum oculis, lachrymarum pluviam & tempestates cadunt, ad funebralium cereorum fulgurationes, Periclea contra implacabilem Lachesim Oratorum detonabunt fulmina. De amisso Capite quæularis? omnes jam, sine sensu lætitiæ nos adesse non dubites. Ad vacuum Urnam hanc, mærentia pectora & nostrum viscera ponimus; ut vel exinde plenitudo publici affectus, erga Te cognoscatur. Jam nivea Sarmatica Aquila, niveis expansis alis, triumphales excitat pyras; ut ex cineribus suis, Patrum Phoenix, quem deploras, ad sidera queat evolare. Peraugustum Craciæ Sedis Capitulum, Tuo Capiti plaudendo, eidem ex se Capitolium facit; ut porè
dum

dum communi urnâ ambiri non possit, nec de-
beat, Cælesti sede dignissimus. Sceptraferâ Pa-
rens Academia, Tuo parentat Patri, & ad Gene-
ralissimi Magistri exequias, suæ obligationis &
Philadelphici affectus præcepta exequi studet
condolendo. Craciæ Metropolis Turres, voca-
lis Campanæ Possessorem, dum Cælis illatum, suo
vertice conijciant, Campanam nonnisi ipsam,
sublimitati suæ attollunt, corda Civium alligant,
obligantq; ut immortalis famæ ipsius sonus audia-
tur. Sed jam jam in omnem terram, istius sonus
exivit Campanæ: Jam Navis Petri in ultimo vitæ
Viri istius margine, per lachrymas fluctuabat; jam
Purpurata Cardinalium Rota, præ dolore crepita-
re visa. Jam ad Principem Petram, cordium toc-
dati pulsus, toties tristis gemituum & dolorum re-
sonavit Echo. Ipsa gentilitia Præsidis Generalis-
simi Campana, continuô laborum & magnorum
operum motu agitata, quantumvis quiescere vi-
deatur, adusq; tamen immortalis famæ exprimit
exprimetq; sonum. Hic dum à sepulchrali Saxo
repercussus, ad nostras pervenit oras, etiam mea,
licet soni organa non sint, occupavit ora, quô non
nisi coram Vobis resonabunt; utpotè ex se minûs
vocalia. Vos tantummodò AA. mæstissimi, ut
SONUS vocalis Campanæ hujus, meritorum fa-
mâ promulgans clariùs audiatur; attentiores non
negate aures; ac eundem benevoli pectoris pulsu,
magis ac magis excitate favendo.

Vocalem immortalis famæ per auras & aures
pereipere sonitum, & cum magno admiratoris
populi applausu, linguâ Oratorum portari, nul-
lus est, qui non ambiat. Plurimi certè dimidias

Curiorū ex ipsis pulveribus attollunt statuas; non
unus ære vetusto fusas, Avorū Atavorumq; indigi-
tat imagines, ut vel hac ab alijs & vulgi exceptione,
vocalem excitet sonantiā. Plurimi aureas Regum
Coronas, Sceptra, fasces, & titulorū insignia inqui-
rendo, honorariæ ædis pulsant ostia; ut à dignitariō
ejusmodi pulsu, per subditā populi turbam, uno mi-
nores Jove credantur, ab immortalī fama, nunquā
propulsentur. Alij splendentia Cræsi accumulāt
crepundia, aureis variabilis fortunæ delectantur
numismatīs, ut eorum tinnitu, clamosi toto Orbe
fortunæ pulli audiantur. Alij vocalia cruenti Gra-
divi intonant classica, ære cient viros, Martemq;
accedunt cantu, congesto armorum strepitu, no-
vam in Regnis & Imperijs excitant Vulcaniam;
jam animola pectora, squammosis cingunt thora-
cibus, jam generosam frontem chalybeatīs inte-
gunt testis; ut inter prælia, plumbeā perculsi pro-
cellā, inter tormentaria fulgura & tonitrua im-
mortalis famæ, non tam ridendam, quā mugi-
entem Echonem percipiant. Alij deniq; impo-
tentes Creatores, vitreos efformari prætendunt
Cælos, quibūs inclusi, vel Bacchos agant, vel tam
fragilis structuræ fracturā, & inanī pompā, debi-
lis famæ, in tanto fundamento, sonum eliciant.
Alij deniq; plumatas ætheris animas volucres, ar-
tificiosīs ipsi naturæ gravibūs instruunt linguis; ut
his instructæ, Deorum titulos & nomina suis ma-
gistris loquantur resonando. Sed ah inanes mor-
talium conatus! ah crepitanti risu miscendos hos
famæ sonitus! quos dum perennaturā fama edere
prætendit, & flatum & animam amittit. Exigu-
us nimium, quantumvis ab æneis Majorum statuīs
elici-

eliciatur quantumvis à fractis Curiorum cruribus
veniat sonitus; quem innatæ probitatis non auget
claritudo, quem vitiorum fragor in malis impe-
dit nepotibus. Strepitum non famam vocalem il-
li merentur; qui puerorum more, in Pactoli con-
fidentes arena, nummorum & metallorum tintin-
nabula movent; & licet cum fabuloso Mida asini-
nas possideant aures, nil tamen, quàm sui elusio-
nem iisdem audiunt ac percipiunt. Execrabilis
non vocalis ille triumphorum in campo Mavor-
tis sonitus, qui ut tantò vocalior audiatur, Patriam
& Regna cum civibus inter incudem & malleum
infortuniorum ponit, qui miserorum Colonorum
clamore miscetur, confunditur. O Vilissimam vi-
trei Cæli gloriam, cujus fragmenta non sonum
famæ vocaliorem excitarunt, sed eandem, suosq;
Creatores lædere videbantur. Adeste ejusmodi
sonitus ridendi, inter hodiernos fletus competito-
res, erubescitè inter squallidas umbras has com-
modius? Adesto homo volucris Icare, adesto?
& qui extincto nomine tuo Icarias fecisti aquas,
in lachrymas præsentis mæroris, iterum cade;
quælivisti inter stridulas volucres, & levem æthe-
ra, levior illò sonum; flebilem sonitum ruinæ in-
venisti: hoc nisi felicior, quòd stultum desideri-
um, integrò adusq; restinguas mari. Adesto cru-
delis extra fabulam Romanæ Urbis Amphion Ne-
ro, adesto! & in luctu tanto, fileas cum tuæ soni-
tu citharæ: musica in luctu, si importuna narra-
tio; certè vel maximè tua, ad cujus chordas non
intestina ovium, sed Matris viscera extraxisti, ad
cujus pulsum Romana mænia saltasse quidem visa,
sed ad ruinam Civium, ad flebiliū commotionem

pulverum, ardenti Vulcano ex tuo voto despon-
sata. Sta & tu clara Principis Phæbi soboles? Ita in-
quam; licet quondam à cælesti axe pronâ cervi-
ce in terras cadens Phæton, fateare precor, qui-
nam à tuo lapsu, à confusi & contusi collisione
corporis elicuit sonitus? si non ille, qui totum fra-
gore Cælestium rotarum adimplens Orbem, te,
tuamq; famam, æternum silere fecit. Ita est AA.
perijt multorum memoria cum sonitu perijt. Il-
le mihi vocalissimus sonitus; qui ex virtutis voca-
libus resultat, qui ex suavi illarum venit charmo-
nia. Ille egregius Cælosq; ipsos penetrans, qui à
devoto Religiosæ portæ pulsu inauditur. Ille fa-
cillimè Divorum aures aurasq; subintrat, qui in
canentium Ascetarum Choro, in Religioso silen-
tio excitatur, elevatur. Ille minimè raucus, quem
mortificationis plagarum & virgarum in corpore
collisio, suo strepitu adaugere videtur. Ille sub-
tilissimus ad tubam famæ spiritus, qui Ascetica
jejuniorum fame extenuatur. Ille toto Orbe cla-
rissimus, qui ab eruditorum calamorum organis,
qui ab Apollinis Chely & Musarum Choro venire
observatur, qui non in clamosis cornibus, sed in
cornutis argumentorum dilemmatis exprimitur.
Ille sonus optimus, quem muti Magistri Libri,
loqui videntur, quem non Herculeæ, sed Typo-
graphicæ literarum edunt columnæ. Ille ac-
ceptatissimus, quem gentilitia arma variarum vir-
tutum percussa motu, suis eliciunt possessoribus,
quem non musicales, sed PETRI Claves, in laudes
multorum ora referando, attestantur. Audi-
re ejusmodi sonum desideratis? gentilitiam
Generalissimi Prædicatorum Præsidis Campanam,
do-

dolentibûs pulsate pectoribûs, vel pulsata, bene-
volis excipite auribûs. Materiam vocalis Campa-
panæ inquiretis? non rudi metallo; sed aureis ho-
norum & dignitatum fusam insignibûs, alti sangvi-
nis & virtutû expolitam splendoribûs, non igno-
rate. Quippe jam Fortuna magnæ illius domesti-
ca Prosapia, ditissima opum cumulabat cimelia,
jam inæstimabiles Tagi & Pactoli aggregabat are-
nas, jam auri argentiq; pretiosas coacervabat
glebas; ut ex tanto metallorum concursu; ex tam
nobili divitiarum materie, quàm subtilissimus
Campanæ prodiret tinnitus. Iam & Honor tantæ
fortunæ favit acervo, quidquid pretiosum posse-
dit, eviscerare videbatur, titulorum pretia, digni-
tatum decora, insignia, addebat promptissimus.
Mavors ipse etiam in CLOCHINIANA hæreditarius
Domo, galeas, clypeos, cuneos, enses, chalybea-
tos thoraces, bellicis attritas laboribus cassides,
ampliandæ tam vocalis Campanæ moli, non ne-
gavit; ut non tantum subtilem fortunæ ederet
sonitum; sed etiam rancô à bellicis tormentorû
armis, resonaret murmure, & ex utroq; notabilis
foret. Quid de fabrica Campanæ hujus per Luci-
nam impensa proferam? totam se tori Dea hæc
fermè suis exinanivit decoribûs; ut vocalem Cam-
panæ huic inspirasset animam: altæ genesis in
Galliarum Regno enodavit fascias, quas ejdem
alligavit, appendit; ut commodius illarum agitato
toto Orbe sonaret. Majorum Illustrissimas appli-
cuit Ceras; ut tantus materie concursus ci-
tius in sonans resolveretur opus. Lineas Familia-
rum duxit, ut formosior & pulchrior formaretur,
& nè suâ, cum cæteris careret nomenclaturâ, ma-

gna magnorum Heroum nomina, sanguinis propinqui ligata nexu associavit, sicq; tam vocale CLOCHINIANÆ Profapiæ Insigne, in altissimarum Domorū sublimitate appendit, vel potius, ut sacrum non profanum crederetur, in Oppido Sancti SEVERI collocavit. Prodit in lucem publicam sub tam vocali Nobilissimæ Domus signo ANTONINUS, primum infantilis labij clamorem, sub gentilitiæ Campanæ edit sonitu, nobiles cunarum agitata, ad motum resonantis Insignis absolvit, dum ex Clochinianæ Domus Majoribus, non minor progeneratur Filius. Benè imò optimè, cunarum Numen Lucina prospexit, quod tantæ expectationis sobolem ANTONINUM in ea Domo locaverit, quæ gentilitia Campana, magnisq; operibus satis clamosa, vocalem novo Hospiti parabit famam, quæ ad primum vitæ ejusdem diluculum, sui stemmatis sonitu, salutationem dicere omnes concitabit. Candidi Prædicatorum Ordinis Præses futurus, non alibi, nisi inter lactea Galliarum Lilia nasci debuerat. Magnorum operum & meritorū lacteus posthac Pater, in tali herba spem monstrare tenebatur. Sedulissimus librorum scrutator & Doctor, inter nivea florum folia pullulare meruerat. Severus Regulæ DOMINICI Observator, nil nisi sanctum in vita acturus, in hæreditario Sanctis fundo, in SEVERI Oppido cunas absolvit; brevi Aquinaticæ Scholæ Discipulus, ab Aquitaniæ excipitur plaga. O felix terq; beatum solum! quod tantos Ecclesiæ & imperijs de tua gleba producis fructus! ô albò laudum calculò digna, florentissimæ Galliæ Lilia; inter quæ honorum & sapientiæ felices nascuntur Candidati. Deessent tibi tam
am.

amplissimi fructuum census, certè vel ipso virorū
proventu, quos ad emolumentum Orbis totius
profers, sat dives, sat opulentissima appareres. Va-
rietate fontium & fluminum alijs præstantior nun-
cuparis, filiorum tamen ubertate & capitum docto-
rum affluentia, multò dignior ab omnibus dici
promereris, quos cū innumeros producis, etiam
unum produxisse CLOCHE satis ad gloriam tibi
adesse non ignores. Crescit ad immortalē famæ
sonitum, inter domesticos Nobilium Parentum
lares felicissimè, & veloces ætatis præterlabentis an-
nos, virtutibūs antecedit, nihilq; puerile habere ob-
servatur, præter annos. Quippe non levia puero-
rum apprehendit tintinnabula, non paternæ famæ
ad gentilitiam Campanam curat sonitum, aut vix
infantilibūs corpus enodavit fasciis, illicò eruditis
sefe alligat fastis, nec tam puerilem cum coætā-
neis excitat arenam; sed avidus Olympicos
intendit pulveres, fermè ab ipso Matris ubere
pendulus, viam lacteam virtutibus ad se fecit,
omnium in lacte candidatus. Mirabatur natura;
quòd tantum in exiguo corpore posset, dum vi-
dit: quomodo infans, necdum pueriles fixè forma-
bat gressus, & jam de virtute in virtutem solido pas-
su procedebat, in aurora vitæ meridiem solatiorū
accendendo. Palmam necdū benè explicabat, &
jam herbam probitati porrigebat, primas teneri-
oris vitæ lineas, ipsīs virtutum punctis distingue-
bat, Nobilissimi sanguinis Hæres, eundem pro se
erubescere non patiebatur, suisq; non minor Ma-
joribūs, intra domesticos parietes, publicò sole &
Cælò digna peragebat facinora: viam viri in
adolescētia, quam olim virorum Sapientissimus

E

igno-

ignoravit; ANTONINUS monstravit. Sed nec
diu accrescens animi in ANTONINO capacitas
domesticis laribus capi potuerat, ex paternis limi-
nibus, ostia Religiosæ ingressus est vitæ, voluptu-
antium in mundo hæredum frangens legem, Re-
gulam magni Patriarchæ DOMINICI suscepit,
omnibus sese exuit opibus: à tanta privatione,
ad habitum sacrationem regressum dari probavit,
gentilitiam Campanam & se totum, Ecclesiæ,
magnæ Prædicatorum Religioni alligando. Quæ-
ratur mæsta ex tanto opere Familia, ipsa for-
tuna mundanas offerens delicias, se postpositam
conqueritur. Ridet tantos fletus Novitius, non
ignorans; quòd nunquam majora sortietur domi-
nia, quàm Dominicanæ Cultor Religionis, nun-
quam securior & tutior apparebit, quàm sub gen-
tilitio Ordinis amplissimi vigilante Catulo. Alci
sanguinis quantumvis deseruero scaturigines
Aquinaticos fontes domesticos jam abhinc possi-
debo. Majorum quantumvis extinxero Ceras,
Thomisticus Phæbus serenos in Religiosis umbris
mihi dies accendet. Ab illustri Parentum quan-
tumvis disparuero Familia, Luminosam tot Pa-
trum ingrediar Domum. Nihil metuo rugosos
Genitoris vultus, serenam Patriarchæ frontem ad-
fidus demissum conspiciens: fulmina irarum &
vituperia postpono, ad laurus Doctorum collo-
catus, ubi inter Prædicatores laudibus prædica-
bor: utpote cùm Religiosissimæ Prædicatorum
Authoritati subijci, est coram Cælo prædicari.
Non desunt Gentilitia Arma, non deest Avitæ
Campanæ sonitus, certè clarior apparebit, in Re-
ligioso resonans silentio, nunquam agilior, quàm
Reli-

Religionis adstrictus nexibus, quam dum in continuo motu virtutum permanebit. Minorennis aetatis, certe pietatis hujus non impediunt desideria, crebrius utique Divorum aras, subtiliores violarum adornant flores, quam procerae Libani aut Cupressi; proximiores ad Altaria minutae campanae, gradiores extra templorum locantur parietes. Associatus amplissimo Praedicatorum Ordini, ordinato agmine asceticas ad se provocavit virtutes, & Novitius Religionis Cultor factus, veteranam cunctis explicuit probitatem. Et dum alij mundanis olim assveti delicijs, religiosam in primo limine mirantur vitam, ipse omnibus miraculo erat, Magistris vel ideo indigebat; ut nimiam monasticæ vitae austeritatem eundem dedocerent, non edocerent; quorum monita suis praeveniebat operibus, iussa obedientissime antecedebat executione, vota coronabat virtutibus, filius virtute senili patrisando. Dubium certe movit, nimirum; an ille virtutibus innatus esset, an illi virtutes, utrumque; tamen ex arte probavit, inter omnes virtuosissimus. Vixque primum Campanæ suae edidit sonitum, illico omnes in sui amorem concitavit, ad affectus concurrere fecit: cursum tamen affectuum & amorum, Scholastico scientiarum copulavit, nec in solis pectoribus recumbere, sed & in magnis Doctorum Capitibus fundari elegit. Coronavit ANTONINI vota Sapientissimus Doctorum Patrumque; Cætus, ubi eundem eruditæ studentium Coronæ associavit, floribus doctis, florem: aureis capitibus aurum addidit. Nullus tamen magis ad mentem THOMÆ vixisse & studuisse visus, Discipulum agente in Schola ANTONINO. Nullus subtiliora

explicabat argumentorum fila, quàm illius subtile ingenium, nullum præceptorum in artibus & scientijs extabat Caput; quod suo non caperet. Nulla Doctoris Angelici summa, cui ille pretium non adderet, nullus articulus, quem ille ad oculum explicando non indigaret. Nulla characteris & literarum linea, quam ille in suam eruditam frontem, nunquam tamen rugosus, non transferret. Nullum librorum folium, quod ille non carperet, suo Capiti in coronam: nulla litera, quam ille non componeret in syllabum encomiorum. Stupuit Tolossana Pallas, ubi vidit quòd non ex ipsius Jovis capite, ast & ex ANTONINI vertice iterum prodire posset, si cunas repetere vellet. Imò ne tanti sudoris semina, præmiorum carerent messe, laurus in coronamentum merito in schola Cultori excoluit, gemmas sudoris doctoralibus Coronis applicavit: iisdem tempora cingendo, cum Discipulum suum, præfecit Magistrum, Gallicano Orbi, Doctorem publicum promulgavit. Optimam propositionem formasti Thomistica cum tuis Doctoribus Schola; quod præmia danda tanto Capiti concluderis, forte argumentum & à nemine retorquendum posuisti, cum ex tot scholasticorum meritorum præmissis, Operario lauream in coronamentum intuleris. Discipulus adusq; ANTONINUS, si Magistrum agebat; certè nunc Magistrum formalem agens; ipsam scientiam Discipulam sui efficiet. Inter studentium classes appensa Ejusdem Campana ad stuporem si resonabat, nunc ad sublimitatem Professoralis Cathedræ evecta, clarior & fonantior ab omnibus audietur, imò sonus ipsius, crede, quòd abhinc in philoso-
phi-

phicarum vocum definitionem & genus abibit;
omnibus ad placitum erit. Non timebit abhinc
adversantia fulmina, sub tanta lauru securus. Do-
ctorali annulo eundem adornasti, hoc ipso tibi
Sapientiam desponsabit, quanquam eam semper
domesticam habeas. Nigricante eruditorum Ca-
pitum eundem dignata es mitrâ, sub hac ille Sa-
pientiæ & Religionis Tuæ primarium aget Princi-
pem. Librum eidem in insigne obtulisti, certè Do-
ctor hic, libri hujus marginibûs Thomistica tene-
bit flumina, ne Zoilorum & adversantium acu-
minibûs fodiantur; procurabit; ut libri hujus folia,
in millena excrecant volumina, totasq; Religionis
tuæ adimpleant Bibliotecas. Sanè eruditûs Docto-
rum jam nunc instructus pennîs, Aquilam aget, pe-
ctoralem Aquinatis Phæbum, ultra omnes, ingeni-
osissima mentis scrutabitur acie. Scrutatus opti-
mè; imò adeò Phæbi hujus incaluit radiò, ut
totus Apostolici zeli ardore inflammaretur, & ad
Cleanteas in umbris scholasticis Ceras, non ce-
reus in vitium flecti, in flumina prædicationis lique-
sceret. Attollite aures AA. jam felici motu, è su-
blimi Doctorum Cathedra, sublimius in Sacras
exedras, cum sua gentilitia Campana ANTONI-
NUS attollitur: *Clarior quò altior.* Placet ejus-
modi motus eruditissime Doctor. Quippe nul-
lus solidior ad Ecclesiæ Cathedras gradus, quàm
ex scholasticis liminibus. Optimè certè illò ex
templo peccatores propulsantur fune, qui ex for-
tissimis argumentorum nectitur filis, non frustra-
nea animarum piscatio, cum ex iisdem retia in la-
chrymarum pænitentium fontes protenduntur.
Vocalis illa Campana; quæ Thomisticæ doctrinæ

primò pulsata articulis pòst ad saxa obdurati pectoris resonare videtur. Plausibilis ille Ecclesiastes & Præco, qui in cathedra Doctorum suis non caruit præconijs. Sub lauru Doctorali in vitia detonabis, nullius Herodis time fulmina. Imò nulli Evangelica Veritas clarior apparebit; quàm ad tuæ mentis splendorem, nunquam tutior, quàm subtilitatis tuæ stipata acuminibùs, & si odium parere videtur, tuorum sensuum mellea aptata suavitate omnibus ad gustum aderit placidissima. Et hîc tacebo ego minus vocalis Orator: loquere tu & testare Apostolum, in illo tempore tuum, felix eodem Aquitania. Fatere inquam! quis CLOCHINIANÆ Campanæ in sacris exedris sonitus? Ab aquis ejusmodi sortita es ethymum, nunquam tamen abundantior visa, quàm à Prædicatoris hujus fontibus, in Ascitana Cadurcensi, Petrocoriensi, Aginnenfi, Burdigalensi, alijsq; innumeris Provincijs & Urbibus personantis. Porro ad tanti Præconis verba, nullus peccator dolenti pectori non applicavit verbera, ad detonantia aliorum sensuum fulgura, nullius lachrymâ non pluebat pupilla, ad figurarum lumina, nemo in bonum non accendi videbatur. Gestu dictisq; docebat, gestis piissimæ vitæ, suisq; exemplis probabat, quidquid optimum dixit, id totum in se remonstrare poterat; virtutem, quàm alijs commendabat, ipse primus servabat, vitium quodcunq; execratus, solus ignorabat, fugiendo. Nullum sacri sermonis exordium hic Ecclesiastes formavit, quod ex fontibus lachrymarum non duceretur. Nullum exordij thema, quod peccatis & sceleribus terminalem epilogum non imponeret, nullum punctum, quod punctu-

ram, etiam obstinatis non inferret pectoribus. Nulla illius periodus, quæ rotunditatem æternitatis non saperet; nullum subtilis ingenij acumen, quod funes peccatorum non solveret; nullus probandi locus, quem à Cælesti domicilio non assumeret. Svavitate verborum Tullius, floriditate dicendi Hortensius, gravitate sensuum Pericles, zelô & styli facilitate Apostolus. Sed ad aliam tandem ejusmodi Tullius vocatus provinciam, pro domo Christi, & Religionis perorans, etiam in domo præesse & prodesse coactus. Quippe ab exedrarum sphæra, à templorum suggestu, in altiore locû, vocalis ANTONINI Campana translata; dum Provinciæ Occitanæ, concordii votorum suffragio dignissimus Præles creatur. Iamq; qui benè vivendi leges audienti populo perfvadebat; mox tandem imperabat; ipsdem felicissimè primus parendo. Atlanteis lacertis onerosam prædicationis deponens Provinciam, honorariam assumpsit: nè utiq; & hanc suo onere carentem. Quippè non ipsæ Purpuræ rubore suos afficiunt gestatores, non ipse aureus coronarum fulgor Regum capita suo adurit radiô, non ipsi fasces suos infascinare videntur possessores, non ipsæ honorariæ dignitatum crucees, proprios martyrisant cruciferos. Habet & crassior lana suas dentatas tineas, etiam fortes sacrorum Cætuum Atlantes imposita lacertis aggravat provincia; imò nulla Ascetarum Regula, suis Præsidibus sine exceptione adest, quam illis ingentes curæ & molestiæ inferunt. Præesse videntur alijs, sed majoribus subsunt pro bono communi, cogitationibus; dominari agnoscuntur, sed dominando; sibi subditis in-

serviunt, ipsò Imperij sui Clavò difficultates sibi
aperiri experiuntur, nec tam manus suas eodem
ornant, quàm onerant. Infractò animò cuncta hæc
pertulit ANTONINUS. Sic Provinciam Occita-
nam Atlas gessit; ut majori ferendæ suppar mon-
straretur. Ad pulsum præidentis sibi Campanæ,
nemo non incitabatur ad virtutem, prodromante
ipso Compulsore. Nunquam Occitana Provincia
occasum felicitatis passa, quoties imperij sui AN-
TONINUS explicabat ortum. Improbos, duros,
molestos in tanto munere obiens labores, summâ
inter omnes probitate eminebat, cunctis flexibilis,
nemini molestus, omnibus amandus. Visitabat
Conventus vigilantissimus Præses, non sine plau-
su, non absq; comitatu virtutum; quidquid locu-
tus, in oraculum abibat, & quòcunq; divertit, tri-
podem secum ferebat, nihilq; non admiratione,
non æstimatione dignum peragendo. Exemplis
aliorum non egebat, quibus virtutes svaderet, cum
in se omnia felix possessor teneret. Sic tamen pri-
marium Patrem egit, ut infimum non exueret, eò
demissior, quò sublimior, vel hac operum anthite-
si laudatissimus. Tendendum tamen in Latium
meritissime Provinciæ Occitanæ Præses, à niveis
Gallarum Lilijs, ad florentissimam migrandum est
Italiam, vites utiq; transplantatione melius profi-
cere nosti. Nihil iustius, quàm ut sublimitas men-
tis tuæ intra septicollis Urbis altitudinem emineat,
quàm ut dotum tuarum pretium, non ad Lydium
lapidem, sed ad Petram PETRI probetur, demon-
stretur. Adimplesti tot Galliarum Provincias, Ur-
bes vocalis Campanæ Tuæ sonitu, etiam ad Pe-
tram resonet necessum. Ad claves Ecclesiæ pro-

ximè locatus, altiores honoris ædes Tibi resera-
bis, omniū patentia corda experieris. Ad primum
gentilitiæ Campanæ pulsum, primos convocabis
affectus, amoris erga Te excitabis humanitatem,
amicorum agnosces concursum. Caput Urbium
Roma credetuo posthac indigebit sensu, purpura-
ta Cardinalium Sphæra, Te suam in consilijs habe-
bit intelligentiam. Stetit Romæ ANTONINUS
CLOCHE, stetit omniū plausu & affectu exceptus,
omni exceptione Vir major: doctissimi animi rari-
ores explicans dotes, ad mentē summis protunc
totius Prædicatorum Ordinis Præsidibus successit:
dū à Reverendissimo Patre Magistro Generali JO-
ANNE THOMA de ROCABERTI: mox tandē
ab ANTONIO de MONROY MEXICANO in
Socium & Secretarium assumptus extitit. Credi-
te AA. nunquā gratiofior visus JOANNES, quàm ubi
in suam gratiam ANTONINUM CLOCHE ad-
scivit. Vocem clamantem se tunc vel maximè pro-
bavit, cum ad sonum vocalis Campanæ iura &
leges Religioni dicebat, cum per socium CLO-
CHE loqueretur. Nunquam magis abyssum se
THOMAS Generalis monstravit, quàm penes pro-
funditatem sensuum ANTONINI. Alter ANTO-
NIUS pulchram Nominis sui etiam ratus parono-
masiam, cum eidem ANTONINO CLOCHE
sociaretur. Verum se Inventorem supponere de-
buit, cum tantum Secretarium adinvenit. Imò
miraculosus ANTONIUS dici potuerat, cum tantū
ingeniorum prodigium penes se conservaret.
Compendiosius dicam: optimè Præsides hi am-
plissimæ suæ prospiciebant Religioni, cum illorum
ocellum CLOCHE agere videbatur.

Mellea
Impe.

Imperij sui experti sunt sceptrā, cū illa, svavitate sua ANTONINUS adaptabat. Nullum tanti honoris senferunt onus, cū tantum Atlantem adiutorem habuerunt. Aurea sanè numerabant momenta, felices vivebant horas, dum easdem CLOCHINIANA pulsabat Campana. Honor nonnisi ipse Generalissimus indignari credebatur, quòd CLOCHE socium & assistentem, non suū Possessorem habuerit, quem pridem habere exoptabat. Itaq; sui feliciter gubernantes Præfides, ad Archipræsuleas promovit Insulas, ut tam emeritissimo suam cederent sedem, & quem socium habuerunt laboris, etiam successorem honoris viderent. Sicq; dū illi Archipræsuleam apprehenderunt Crucem, ANTONINUS Religiosum Clavū assumpsit, cū illi purpurato eminuerunt in ostro, ille album calculū, ad primatiale Prædicatorum Ordinis honorem, obtinuit. Favit magnæ illius virtuti innocentia, dū concordibus electum votis INNOCENTIUS XI. approbavit, summum Religiosi Honoris ascendenti verticem, benedictionis Sanctissimæ Crucem apposuit, ut sub eadem non caderet, sed iret celerior, imperaret felicior. Optimè consuluisse tibi videris, sine cerussa loquor, Candidissime Prædicatorum Ordo; quòd Atlanti tanto universum Religionis imposueris Orbem. A capite si prima venit valetudo, certè sub hoc plurimū toto Orbe valebis ælmatissima, sub lacteo Patre hōc, nihil amarum experieris. Porro regulariter Tui Instituti sonabunt leges, dum tuam Generalissimam aget Regulam, omnes Tibi subicientur successuum species, sub tanto Prædicatorum Genere Vniversali. Procul omnium ad-

ver-

versitatum à Te propulsabuntur nubila, condensata malignantis temporis fugient nubes, resonante magni tui Generalis Campanâ, nec ad crepitantis famæ tubam, quam ad istius Campanæ sonitum, gentilitius tuus Catulus, crede tibi abhinc venabitur fortunam. Securè ad tædiferum Syrium hunc quiescere & vacare poteris; dum pro Te ejusmodi vigilabit Antipater. Revereri mala ne minima poteris, tantum nacta Reverendissimum. AQUINATICUS Phæbus nunquam ardentior apricabit, quàm in signo Aviti ejusdem confidens Leonis. Exuberabunt uberius Thomistica flumina; cùm tantum fontem coronasti, qui in tua commoda diffluet liberalissimus. Ita est A A. possedit, Religiosum Generalissimus Præses thronum, illicò omnium corda & animos occupavit, in quo feliciter imperans, tunc optimam quietem suam supposebat, cum pro bono publico intensissimè laboraret, talemq; se Principi Romæ, Præses hic demonstravit, ut ad dicentis sensus vel ipsi excitati pulveribus Tullij: aut consummati Catones, suum suspenderent supercilium. Enodandi, erant magni difficultatû nexus, enodavit Doctissimus Prædicatorum Generalis; resolvenda erant occurrentium perplexitatum dubia, resolvit facillimè ANTONINUS; porrigenda erant salubria in arduis consilia; porrexit ad omnium stuporem ANTONINUS; quoties publicè argumentorum explicuit fila, toties jisdem omnes in triumphum duxit, nec unum ex difficultatû Labyrintho eduxit Theseum. Porro nullum vitæ ejus momentum, quod monumentum non mereatur; nulla diei aurora, quæ auream horam non diceret; nulla dies, sine

linea virtutis, probitatis; nullus crescentis Lunæ
mensis, qui plenitudinem non augeret meritō;
nullus annorum circulus; qui æternitati inferendus
non esset. Totas in continuū vigilantissimus con-
sumebat noctes, ut alter ad flammantem DOMINICI
facem Cleanthes diceretur, imò cum nonnisi
ipsa immortalia perageret facinora, ne mortis qui-
dem fratrem somnum admittere elegit. Verè
animata Prædicatorum Sapientia Pater hic, nun-
quā in molli lecto jacere videbatur. Inter libro-
rum folia curiosissimus scrutator, gentilitiō DO-
MINICI Catulō verborum lepores, prædam summæ
perfectionis venabatur, quam toties humanissi-
mus non sine sale, majestuosissimus non sine gra-
vitate exponebat. Sicq; cum omnes se ipsō satia-
ret, ipse Cælestibûs cogitationibûs plenus fameli-
cam abstemius ducebat vitam; oleō Capitis erudi-
tissimi contentus, carnibus vesci toto fermè regi-
minis summi tempore abhorrebat; ut tantò levior
Doctoralibûs instructus calamis, ad sydera Cæli
tolleretur, quæ sublimi mente tangebatur, continu-
us cælestis Objecti speculator. Sapientissimo mul-
tarum Congregationum confessui quoties adfuit,
toties omnium plausus & animos in sui admiratio-
nem congregavit; tripodemq; consiliorum mo-
vit, ne Delphis quereretur, cum Romæ in illo la-
teret. Nemo Congregationis floridiorem redde-
bat coronam, quā dum ille verborum rosas lo-
queretur, nemo congressum numerosiorem; quā
ille suā copiā rationum. Stupuit toties Purpura-
ta Cardinalium Rota, ad facundi oris ipsius rotun-
ditatem, velocioreq; volvebat sensus, ad oleū tam
eruditi Capitis, jam ex se triumphales arcus victori
paran-

pārando, jam omnem laborem impendendo, ut
CLOCHE ad altissima quæq; eveheretur. Imò sub
Cardinalitio Galero purpurati sui honoris ardens
splendoribûs, eò vel maximè æstuabat desiderio;
ut aspernans honores meritissimi Generalis mode-
stia, in pænam Cardinalitiæ implicaretur Rotæ, ut
Religiosa eidem congenita humilitas, in summo
videretur fastigio, ut rarior tanti Viri Majestas, in-
ter Eminentissimos appareret, ut venerandus ani-
mi candor, sub Cardinalitium Galerum quantoci-
ùs abiret, nec inter umbras ampliùs delitesceret,
latendo: ut vocalis ejusdem Campana, in cardini-
bus tantis moveretur, & eò vocaliorem Christiano
Orbi ederet sonum. Mereri tamen non habere
honorem contentus Prædicatorum Generalis,
sicq; dùm honores effugeret, in amicorum pecto-
ra & amores incidit, quorum scintillas ad sepul-
chrale saxum, imbellis calami acumine elicere no-
lo, utpote cùm amor huic, ut alatus appareat,
nulla Oratoris sufficere potest penna. Vnicum
nonnisi explico amicitiaë vinculum, quò alligatus
extiterat, Eminentissimo CARDINALI CASSANA-
TA omnium pectoribûs dignus Generalis. Nimi-
rùm amabat ardens in purpura sinceritas, niten-
tem in Religioso habitu candorem, Religiosis ad
strictum vinculis, majori amoris nexu stringebat,
vultis scire, quo intensioris gradu? sic eum dile-
xit, ut seipsum & omnia dare non negaverit. Bi-
bliothecam Conventus de MINERVA Ordinis Prædi-
catorum aliquot librorum millibus augendo, sex
Theologorum Professorum ad enodandos fidei
sensus, ad promovendam Doctoris Angelici do-
ctrinam, novam foundationem liberalissime eri-

gendo. O raram amicorum pectorum unitatem!
quæ tot beneficiorum millia Ordini Sacratissimo
multiplicavit. O inæstimabile amoris pretium!
quod eruditam Angelico Doctore adauxit summa.
O non fictum & extra fabulam pectorum cupidi-
nem! qui non nudum se, sed cum tanto beneficio-
rum apparatu, Dominicanæ præsentavit Religioni.
O amoris ignes! qui ardentem Dominici facem,
majori lumine illustratis. O effusa sociorum pe-
ctora! à quibus tanta gratiarum exundavit affluen-
tia. O animi virorum consonantes! ô amici vo-
cales! ex quibus eruditæ Prædicatorum Minervæ,
tanta librorum composita moles, ex quibus non
syllabæ tantum, sed millenus voluminum coaluit
syllabus. O virorem affectuum! ex quo tot creve-
runt, scholæ Thomisticæ folia. O nimis vocalem
ANTONINI Campanam, ad cujus sonitum tot
muti & mortui in Bibliotheca surrexerunt & stete-
runt Magistri. Verum tantumne huic Purpurato
pectori ANTONINUS adhæsit? minimè, etiam
ad mentem & sensum summorum in Ecclesia Ca-
pitum existerat. ALEXANDRO Sanctissimo fi-
delissimum Ephestionem agebat, ejus nominis IX.
Pontifici, ille inter alios innumeros, Vir ut octo
habebatur, quem etiam vivæ vocis oraculo. *Dex-*
trum Ecclesia Brachium appellavit. Dextrè, imò dex-
terrimè ALEXANDER Sanctissime; quis, qualis,
quantusve ANTONINUS fuerit, resolvisti dubiū;
dum eundem tantò laudis intitulasti epithetò. La-
teranensi Templo FRANCISCUS quondam supposu-
it lacertos, certè & Atlas hic, Universalis Eccle-
siæ brachium ager, totumq; fidei sustentabit
Olympum. Non unam brachium hoc, pro Te
para-

paratus bajulare Crucem, ut Fides salva & integra
ab Hæreticorum insultibus permaneat. Sustulit
Trojanus Æneas adustô lacertô ex ardentibus ti-
tionibus Patrem: Brachium hoc, æmulô exemplô
ex voracibus Hæreseos flammis, efferet Ecclesiam
Matrem. Nimirum irreperat quondam virtutis
specie, palliatum monstrum larens angvis in herba,
exitialis sub cinere scintilla Molinistarum error,
qui magnam fidei molebatur jacturam, & Quie-
tistarum simul indutus cognomine, totam jam in-
quietare cæperat Romam. Quid ad hæc vigilan-
tissimus Prædicatorum cum suo Ordine Genera-
lis? tantisper non quievit, donec Turbatores Ec-
clesiæ quiescerent, donec molienti ruinam huic
Turbini, rapacissimæ contra Ovile Christi ^{feræ} profun-
ditate sensum foveam pararet, in quam persequen-
te gentilitiô Religionis suæ Catulô, incidere debu-
erat: donec tam crassam errorum nubem, avitâ
fugaret Campanâ, ne PETRI Naviculæ aliquod
subsequeretur naufragium; donec tanto sceleri ad-
funus pulsaret. Sed non ad funera tantum Hærese-
os, istius Campanæ pulsus; etiam dignitarios mul-
tis excitavit titulos, etiam ad ædem honoris non
uni resonavit. Imò ne suis Antecessoribus minor
appareret, Ordinem suum sat Archipræsuleis Infu-
lis maximum, majorem fecit, Dominicanorum
Candorem Cardinalitiâ in Patre Fratre THOMA
FERRAN (alios fileo) rubescere purpurâ vidit,
quâ solus depingi non curavit, candore notabilis
ipso: satis honoris, satis gloriæ ratus, dum mino-
res se, honoribus maximis pares haberet, dum po-
testati Generalissimæ suæ subjectos, primis ferme
titulis turgescere adverteret. Illud maximum Ca-

pitis sui decus supponebat, non gemmeis Infulis, aut falsi sudoris unionibus frontem exornare; mille molestiarum & curarum pro bono publico tolerare onera, plus quam Archipræsuleam crucem autumabat; ad librorum folia ardenti excandescere animo, suam purpuram arbitratus, & alios honoribus coronari videns, suum Coronamentum esse censuit. Pro Sanctorum denique gloria, quantum pientissimus laboraverit, vel ipsæ gratiæ, ut ora fingant necessum. Totam ille exviscerabat fortunam; ut sat in terris felix Beatitudo Cælicolarum, sanctitatis titulo felicior redderetur. Omnem Credite movit lapidem, ut Sanctorum Aræ eò solidiori gloriæ inniterentur fundamento. Nobilem felicitatis suæ supponens portionem; si Sanctorum fastis, quam plurimi Religionis suæ cultores adnotarentur. Tunc fore sacram Domus suæ gentilitiæ Campanam, si ad honorem Sanctorum sonaret, audireturque vocalissima. Non vanò utique ardentis pectoris desiderio: nam ad sonitum Campanæ hujus, extra practicum Ecclesiis morem, plus quam ter Sanctus Ordini sacro decantatum, ubi quippe Beatorum animæ, summi Ecclesiæ Capitis oraculo, iustissimum Sanctitatis & gloriæ epithetum audire: Cognominari eosdem expectatis? JOANNA Regis Portugaliæ Filia, OSANNA de Mantua; AUGUSTINUS de Lucera Episcopus, CESLAUS HYACINTHI Frater, PIUS V. Pontifex, omnes Prædicatorum Ordinis & Regulæ Cultores. O felix verique Sanctum Præsidis hujus Caput, quod pro Sanctis laborare & cogitare novit. O disertum tanti Patris labium, quod etiam pro Divis orare & perorare non igno.

ignoravit. O pretiosas defudantis frontis gem-
mas, quæ in Coronamentum Beatorum stillavere.
O liliatum Patris senium, quod in album Sancto-
rum tot Beatis reffloruit. Satis, satis Virgineô JO-
ANNA eminuit flore; nunquam tamen pulchrius
effloruit, quam sub nivibus senescentis Prædicato-
rum Capitis. Regios vel ab ipsis cunis possedit ti-
tulos, nunquam tamen maiores obtinere potuit,
quam eisdem sibi Generalissimo Patre procuran-
te. Satis clamosa miraculis inclaruit OSANNA,
tunc tamen in excelsis audiri meruit, ad sui nomi-
nis inter Sanctos elevationem; CLOCHINIANA
Campana ad summi Pastoris gratiam pulsante.
Tunc AUGUSTINUS augustior adesse observa-
tus, cum laborum angustias pro ipsius gloria AN-
TONINUS impendit, & Sanctitatis Phæbum non
alibi ortum fuisse expertus, quam ex vigiliarum
umbris Generalis. Ipse HYACINTHUS Atlan-
teos & adamantinos Viri istius labores approba-
vit, dum Fratrem suum sic ab eo elatum salutavit.
Ex sacris bustis admirabundus, caput attollit, dum
CESLAUS Frater canonisatus venijt. PIUS.V. nul-
lius pietatem magis erga se expertus, quam dum
CLOCHE eundem sanctificari effecit, dum hanc
quintam vel potius summam pietatis essentiam in-
ter Sanctos existere procuravit. Sed eheu quam
breves sunt vitæ humanæ deliciæ! quid erit securû!
si & Sanctis stare diutiùs negatum. Sanè magnis
magna esse, sæpè nocivû est. Incubuit gravius Cæ-
lum Atlanti, quia altus: feriunt fulmina montes,
quia summi; colludentes puero Macedoni Aquilæ,
panem de manibus eripiunt; quia Magnus.
Generalissimus totius Ordinis Prædicatorum Præ-
ses

ses, dùm ad septicollem Urbium Romam, sublimis
ingenij eminet acumine, fatorum fulmen expe-
ritur, dùm pro bono Ecclesiæ, Religionis sollicitus
labores impendit; etiam morbo laborare cogitur.
Ardens zelo & Religionis fervore Ætna, febrici-
tantibûs incalescit flammis. Quid agitis ô fatua
Parcarum fata! Lacteus Candidi Ordinis Pater hic,
vestram satiare & lactare non debet orexim, ad al-
bicantes emeritissimi Capitis tanti nives, vos arde-
re non debetis, nec illud vestro albescere pallore
meretur. Zelantissimus Sanctorum Promotor,
cùm multos inscribi fastis procuraverit, vestro
profanari tactu non debet, proscribi è vivis non
tenetur. *Dextrum Ecclesiæ brachium est*, onus mortis,
quod omnibus impositis tolerare eundem absit.
Fidei aureus defensor, vestra chalybeata falce of-
fendi non debet. Difficultatum ad Orbis stupo-
rem resolutorem, ligari vinculis vestris, anathema
sit. Clavium PETRI tantus Cultor, lumina non
claudat. Purpuratæ Cardinalium Rotæ, intelligen-
tia Motrix rotatam fortunam, non vestrorum ossi-
um meretur sortilegia, & tristes aleas. Urgent ta-
men audentiùs fata, vocali famâ sonantem Cam-
panam, sepulchrali saxo pulsare & excipere atten-
tant. Non ægrò animò, quantumvis totò debilissi-
mus corpore, tantam fatorum importunitatem
sustinet ANTONINUS, dumq; fati suam pulsare
Campanam præsentit, ad preces tremulo genu la-
chrymabundus flectit. In viam æternitatis abitu-
rus, Viam & Veritatem CHRISTUM sub nube pa-
nis latentem inquirat, & ne in cursu deficiat, Cæ-
lesti Cibò satiatur. Concurrunt undiq; plorantia
magnorum Patrum agmina, veniunt amantùm
Ho-

Hospitum sine numero cætus, hi membra dolentia tangunt, illi vultus mutatos defleunt, hi morbi originem inquirunt, illi annos meritis plenos numerant, de suis, ut vivat daturi, alij in fata implacabilia conqueruntur, alij mæstū exhilarare satagunt, nisi ultrò ab oculis madentes lachrymæ fictitia solatia indicarent, hi vitam prolixiorē appromittunt, illi angulos gemitibus replent, hi gemunt, illi suspirant, hi lachrymantur, omnes sua fata incusant, quòd citiori potius ad eosdem non properarunt gradu; ut ad tantum tardassent Præsidentem. Minimè ad tantam Amicorum scænam, ad tantum dolorum strepitum mutatur ANTONINUS, ultimum vitæ meditatur epilogum, ridet flebilia fata, ex tantis amantium lachrymarum fontibus, exhortationis suæ ducit exordium. Jam membris frigentibus, jam congelato per venas sanguine, ardentes ab ore & pectore dicit flammæ, inter spinas mortis, rosas effundit, hyemante vitâ, Apostolico vernat ipse marcidus sermone. In duro reclinans lectulo, ceu de Cathedra Theologicas explicat & profitetur Virtutes. Morti jam proximus, vitæ Sanctissimæ Filijs suis promulgat leges; lachrymâ ipsâ vitam extinguere parat, dolenti pro peccatis pectore, quæ committere nunquam visus, ultimam horam vel potius ultimum minutum exprimit, dum, inter amplexus omnium & suspiria, exspirat. Dolet Orbis & Urbium Caput Roma, quòd suum abscissum sentit Brachium; pallet Purpurata Cardinalium Rota, & summis doloribus agitur, quòd suam Intelligentiam amiserit. Scinditur dolore Vaticana Petra, dum funeream CLOCHINIANÆ Campanæ excipit Echo-

I 2

nem

nem & sonitum. Gemit populus, turbatur tota
Civitas, quòd tantum perdiderit Civem. Reli-
giosissimus Patrum Ordo, suo parentat Parenti,
rædifer DOMINICI Catulus, ad fata & funus sui
Præsidis, cum sua funali eclypsatur. Sol obscura-
tur Thomisticus, nubemq. doloris induit, forsitan
& Stellæ casuræ, ni ad eas sydereus Pater properas-
set. Sed procul lachrymæ, gemitus, & suspiria.
A.A. Sanctius Magnus Prædicatorum Præses, vi-
vere cum jam non posset, vivere, desit: & Ge-
neralis Magister, ut benè alios mori doceret, quos
benè vivere docuerat. Non ut frägerent CLOCHI-
NIANAM Campanam, fata eandem pulsarunt; sed
ut ejusdem Possessor integras noctes insomnis du-
cens, tandem à laboribus quiesceret, & ad silentij
expressum pulsum in Domino obdormiret. Pul-
savit inquam Libitina Campanam, ut sonus glo-
riæ & immortalis famæ in omnem terram tanti
Viri exiret. Pridem in Cardinalitia Rota Patrem
hunc eminere dignum conspiciens, æternitatis
sphæræ eundem implicuit. Liliatum emeritissimi
Generalis senium, ne inter hyemantes Februarij
ferias marcesceret, Cælesti Paradiso implantavit.
Totam vitam in Jejunio & austerâ fame ANTO-
NINUS cum duceret, ad Cælestes dapes in sacra
Quadragesima cum illo dispensatum. Plurimos
Sanctos cum fastis inscribi procuraret, ad eosdem
in Libro Vitæ vicendos properavit: & terras suæ
famæ sonitu adimplens; etiam, Cælos im-
plere debuerat. Ita est A.A. jam ipsis Cælorum
cardinibus CLOCHINIANA appensa Campana, jam
æternum sonat & sonabit. Tibi tamen primas
exprimit obligato corde gratias, ô Princeps Urbium
&

& Orbis Caput Roma, clausit jam ANTONI-
NUS cum sua vita lumina; Tibi ut omnes felici-
tates & fortunæ ad claves PETRI pateant, Divi-
nam pulsabit Majestatem. Quotquot beneficiorum
à Te expertus est fontes, hos inter dolentes Cli-
entum fundit lachrymas, precando: ut Navis PE-
TRI, nunquam inter adversitatum fluctuet procel-
las. Altius jam Tuo septicolli sese extulit Olym-
po, è nubibus tamen mæroris istius, quas inter fa-
ta ipsius suspendisti, aureos in Te à Cælis jaculari
imbres exoptabit. Exprimit & Vobis Campana
vocalis hæc suæ gratitudinis pullum, Reges & Prin-
cipes, quibus toties consiliorum sensus expressit;
vobis suos affectus explicat, quorum arduas diffi-
cultates toties composuit, cum voto: ut ex Cu-
pressis illius, Regia Vestra in immensum crescant
& augeantur poma, ut à fatalibus illius pulveribus,
nulla Purpuris Vestris adversitatum tinea veniat.
Tibi tandem Paternum elicit Tuus Pater affectum,
magne Prædicatorum Ordo, imò Generalis Ma-
gister magis terq; vocaliores, Tuæ filiali propen-
sioni sonante Campana exprimit pulsus, & dum
illi ex ipsis pectoribus debitos erigis Colossos,
hîs ille *plus ultra* adscribit, ut quàm plurimîs & ma-
ximis implearis Capitibûs, ut ex sepulchralibus
illius cineribus, Phænices in Elijs Patres nascan-
tur, ut ex his, quos elicis ad funebralem pompam
scintillis, Soles candidi Tibi ~~exeriantur~~, ex lachry-
mis solatia fluant. Vestrum deniq; AA. Mæstissi-
mi corda petit, Campanæ istius sonitus; quorum
aures & animos occupavit, quotquot eidem dolo-
ris impressistis ictus, tot illa pulsus ad Cælos pro


Vestris successibus explicabit, vestris suspirijs mo-
ta, Superos movebit, ut ad quævis vota attentio-
res vobis reddantur, efficietq; ut dum illius vitæ
filâ, acutô trium sororum abscinduntur telô, vo-
bis Purpuræ honorum nectantur ut funereis pom-
pæ istius ceris, diurnæ vitæ vobis consignan-
tur privilegia, ut in turbido dolentium lachry-
marum feliciora pescari possitis. Brevius lo-
quar: hoc ANTONINI Campana sona-
bit; ut vos nonnisi felicia cuncta audi-
atis. Quæ dum suo sonitu meam
confundit facundiam, silere
facit, sileo qui


D I X I.



ra:
de-
la-
A,
N-
m-
lo-
le-
ra-
ab
ge:
ta-
æ









G
410